

22/06/2000

Muslihat agenda Barat

KETIKA menyampaikan syarahan bertajuk 'Strategi Malaysia menghadapi krisis kewangan, kesan globalisasi terhadap negara membangun' di Universiti Kaherah, Datuk Seri Dr Mahathir Mohamad berikrar bahawa Malaysia akan mempertahankan negara serta kemakmuran rakyat jika mendapati slogan dan ideologi baru yang dilaung-laungkan Barat mempunyai agenda tersembunyi.

Sikap 'api dalam sekam' negara Barat bukanlah satu andaian lagi. Sudah jelas lagi bersuluh, Barat sentiasa mempunyai agenda dalam apa juga gerak langkah mereka. Bagi Malaysia, sikap berwaspada terhadap apa juga bentuk ancaman Barat sama ada menerusi percaturan politik, ekonomi, sosial dan sebagainya, sentiasa dalam perhatian dan pengawasan. Jika bantuan yang cuba dihulurkan, ia tidak akan diterima membabi-butu. Segala syarat perlu dikaji bagi mengelakkan termakan diri sendiri. Barat boleh memperkenalkan teknologi, tapi ia tidak akan diterima bulat-bulat sebelum diperinci. Hari ini, Barat memaparkan gagasan globalisasi dan liberalisasi. Dari segi cara gagasan ini dipaparkan kepada dunia, ia digambarkan seolah-olah tidak ada cacat celanya. Hakikatnya, ia penuh dengan tipu muslihat. Sebagaimana dinyatakan oleh Perdana Menteri, Malaysia tidak akan membiarkan diri dijual dengan idea, ideologi dan slogan tanpa mengkajinya dengan teliti.

Disebabkan Dr Mahathir bercakap kepada sarjana dan masyarakat antarabangsa, ia boleh dianggap sebagai peringatan kepada mereka supaya lebih berwaspada terhadap putar-belit Barat. Ini tidak bermakna segala-galanya dari Barat buruk. Jika untuk kebaikan, tidak ada salahnya digunakan. Cuma, jangan sekali percaya janji manis daripada Barat. Barat mungkin boleh menjanjikan kemewahan tetapi di sebalik janji mereka, Barat dapat melihat ke-untungan yang berlipat ganda akan dibawa pulang ke negara mereka. Jika pengaruh ideologi menjadi matlamat mereka, Barat boleh meninggalkan perpecahan dan persengketaan yang besar di kalangan rakyat. Jika matlamat untuk merosakkan akhlak masyarakat, mereka boleh meninggalkan gejala sosial yang sukar dibendung. Jika kekayaan yang mereka harapkan, Barat dengan mudah menjajah mereka. Ini sudah pun dibuktikan dan mereka boleh membuktikannya sekali lagi, walaupun di negara yang sudah merdeka dengan cara yang begitu licik.

(END)